

G9—12—027

致总署 论调金运昌<sup>[2]</sup>

光绪九年十二月二十六日

再，前承电询金运昌能否调津，当即电复。查金提督十月间来函，所部皖军已陆续裁撤，全数入关。该提督因咯血旧恙复发，拟请假就医云云。是该提督所部全撤，已无可调。其人朴勇能战，而约束、训练稍欠讲求。合并附陈。鸿章又启。

G9—12—028

复山西香涛中丞张<sup>[2]</sup>

光绪九年十二月二十八日

香翁仁兄年大人阁下：

昨奉十四日手教，敬聆一一。比惟荅略远敷，勋猷日茂，驰企曷任。唐景星顷已回沪，闻约有西洋矿师东来，俟开河后北上，当与商遣。开平系煤师，非开铁好手，津沪膺鼎更多，不敢滥荐。醇邸亦拟于西山斋堂等处开煤铁矿，属景星物色矿师，但无股本，事必难成。平定距直尚近，四天门既成坦荡，机器或能拆运，容有善相者，当资之入山，以副淳属。海禁虽开，必得铁好价廉，与洋产相埒，乃可畅销。顷因制粗器，飭局员在津市购晋铁，据称较洋铁并不贱，岂陆运费本耶。盖洋铁方圆大小板条，恰如人意，不独质地纯净也。晋军先用前门枪，俟操熟再购后膛，此不易之法。近幼樵在总署商令敝处代购克虏卜过山炮百尊，哈乞开思、毛瑟枪各五千枝，以备海防、边防。各省借拨缴价，惟皆极精致之品，有器而不善用与无器等。振轩电称，粤将尚不知操用洋军火，何论滇、桂，恐各省大率类此，遽与西兵敌，利钝殊无把握耳。邓光华开铜矿，如有股可集，自应试办。郑国栋证供，其徒党有在本籍者，望密咨查拿。该府县先未能觉察，疲玩可恨。直境洼区尚多未涸农田，虽不甚盼雪，时令则宜霈祥霖，乃仅霏微数点，晋中将毋同。屡蒙惠颁振策巨万，感激何穷。率复，敬叩春祺，谨璧谦称。不悃。弟制鸿章顿首。

再，越事蒙举数条见询，谨罄所知以对：

一、振帅以省防自任，故有雪老屯琼之议，以分责任。嗣长将军等电请留雪帅驻省，仅拨王之春楚勇二营驻琼。尊论省城稳固，敌虽袭琼，必能逐而去之，是重视彭而轻视法，恐彭、张无此力量。内意既不欲彭远去，自应缓图琼防。

一、道员、总兵以上，有可属大事而未见用者，鄙意竟少惬意贵当之人，空疏可愧。大潜才气，陵轹一切，但不欲轻出，所部散在南北，若调集则饷不应手，时事艰棘，彼固深知，不易强起。

一、闽中已特召厚庵，未知行止若何。台湾刘道能办土匪，军事布置未闻

方略。

一、旅顺炮台一座甫成，宋军添募四营，有警则敛快船入口，水陆相依，聊资控扼，不敢谓足恃也。

一、法外部于劫侯嫌衅已深，其言格格不入。渠常驻伦敦，固非不得已，法又不肯派专使来华，相持日久，如何了局。

一、英、美、日各邦，果至法船深入，似应申明公法，局外不得接济，目下尚非其时。

一、岑彦帅月内可抵兴化。法军声言进图北宁，似尚围而未攻，且俟新兵添到，看其如何举动。此时山北以南均为法人坚守，无论滇、桂，皆不径达顺化。

一、清卿所部，操练洋器甚精，颇思及锋而试，未闻有东归者。见筹议吉防替人，尚未复奏。

再奉另示，以船事殷殷称谢，愧悚莫名。闻鄂局诸道初颇作梗，嗣经敝处批咨，亦遂遵办。顷接唐廷枢电复，呈览。西洋铁矿师三年辛俸、来回水脚须二万金，若由尊处专用，即令发电往邀，否则仅察勘可否大办，似不值先糜巨款，或届时令开平矿师往勘，乞酌示。制鸿章又顿首。

G9-12-029

### 复统领毅军四川提台宋<sup>[2]</sup>

光绪九年十二月<sup>①</sup>

祝三仁弟军门麾下：

顷奉十月二十七日惠书，借谗师律咸贞，勋猷萃福，至为欣颂。贵部在旅助工，极形劳勩，前饬袁道等酌拨银米解营，分别赏犒，稍酬士卒胼胝之劳，乃蒙齿谢，弥以为愧。旅顺为北洋最要门户，此时法、越构兵，衅端已兆，尤应未雨绸缪，务望督饬所部勤苦操练，严密防范，随时会商丁雨亭、王荣春，水陆相依，保此要口。想执事威名久著，成算在胸，自能制敌于无形也。专泐，复颂勋祺，诸惟爱照，不具。愚兄。

① 撰信月份据存档顺序。原稿无日期，按体例姑置月末。